

qu'il deuoit dire qu'elle tend plus sur la bise, veu qu'il fault passer premieremēt le lac qui est au dessoubz, & puis apres le Danube, & apres cela les plaines entre les montaignes conduysēt en la forest. Or la forest Noyre est garnie & pleine de pins & obscure, & a beaucoup de grās & haultz arbres: il y a aussi en icelle des haultes mōtaignes, lesquelles finissēt du costē d'occidēt pres de Brisgau: & du costē d'oriēt elles se cōuertissent petit a petit en pleines, cōme du costē de la bise aussi. Elle est habitée de tous costez, excepté en quelques hault & desertz sommetz de montaignes. Elle a diuers nōs en diuers lieux. Car entre Basle & Friburg on l'appelle la forest Noyre, & anciennemēt on l'appelloit la forest de Orcin. Aupres de Pfortzheim on la nōme Hagenschiefs, & Orenwald, c'est à dire la forest d'Ottho pres de la ville de Heidelberg: & en quelques aultres lieux on l'appelle les Alpes. Or la terre de ceste forest est aspre, & perd sa semence en beaucoup de lieux s'elle n'est bruslée. Elle ne porte point des arbres fruttiers qu'à grand peine, si non es vallées entre les montaignes: il y a toutesfois des pasturages fort gras, ou on peut nourrir grande quantite de bestial. Et pourtant



il y a des payfans bien riches, en sortes qu'il y en a plusieurs qui nourrissent 12. vaches le long de l'hyuer, & engraisent beaucoup de bœufz, les chairs desquelz (cōme on dict) sont meilleures que des bœufz de Boheme, de Hongrie & de Suicth. Plusieurs aussi des habitans de ceste forest viuent de vendre du bois & de la resine. Es vallées il y a des fontaines & ruisseaux fertiles, qui arrousent les lieux circonuoyfins: & oultre les excellens poissons qu'ilz produisent, ilz profitent encore d'une aultre sorte aux hommes. Car le pin qu'on y prend, est fort propre pour bastir des maisons selon sa haulteur & grandeur: lequel ilz fendent à diuers vsages. Ilz en font des radeaux, qui sont grandes pieces de bois liées ensemble, lesquelles ilz mettent sur l'eau, & les cōduysent iusques au Rhein & au Danube: & de cela ilz en font grand profit. Il y a aussi des fontaines d'eauē chaulde en ceste forest.

De ceste eauē on a faict deux baings fort renommez, l'un en la ville de Bade le noble, dont les marquis de Bade ont prins leur nom: & l'autre est en la ville de Vuilbadē, lequel est appelé le baing naturel, lequel est cogneu par tout. Il y a aussi en ceste forest des veines d'argent, & des fontaines de sel. D'auantage elle a quelques villes & plusieurs villages, & à l'enuiron il y a des villes, chasteaux, bourgades & villages qui luy donnent lustre: dont la forest qui au demeurant est aspre & rude, est tolerable aux habitans, & cela faict qu'ilz y peuuent demeurer assez cōmodément. La ou la terre est plus rude, là elle est pierreuse & froide. En beaucoup de lieu il y a faulte d'eauē: toutesfois elle est par tout habitée. Les gens du pays ont grand peine à secouer le grain de la gerbe, veu que la terre y est si pierreuse, qu'il fault quelques fois huit ou neuf iougs de bœufz pour tirer la charrue, & encore n'y font ilz guieres. Et voicy encore de quoy on se doit plus esbahir. En lieu qu'es aultres pays on a acoustume d'oster les cailloux & les pierres des champs comme choses qui empeschent de venir le bled, ilz font tout au contraire: car ilz les gardent pour faire plus rapporter la terre. L'aueue de ceste terre est fort bonne. La plus grand partie de ceste forest est au iourd'uy reduyte en terre labourable & habitable. Les gens de là ont de fort bons moutons & grasses brebiz, abondance de venaisons, poissons, oyseaux, & diuerses sortes de fructz. Or ilz sont subiectz à diuers seigneurs. Car aucuns recognoissent les princes d'Autriche pour seigneurs, les aultres recognoissent les marquis de Bade, les aultres rendent obeissance à d'autres seigneurs, asçauoir cōtes, euesques & gentilz hommes. Ceste forest a tant de villes, chasteaux, bourgs, villages & monasteres, qu'on se pourroit esbahir comme en un si grand desert il y peut auoir si grande commodite que tant de gens y puissent viure. Or voicy les principales places, qui y sont: Hufingen, Villingen, Rotwylam, Furstemberg, Vuolfach, Horb, S. Blaise, Alperspach, le monastere de Tous saintz, Hornberg, S. George, S. Pierre, et plusieurs aultres belles places renommées, sans un nombre infiny de villages & bourgades. Brief c'est merueilles comment vne si grande multitude de gens peuuent viure en ces montaignes rudes